



Kamis, 16 Mei 2024

Ogen: Sepanya 3: 14-20



Paksana Enggo Reh



Bas kai biasana kita nehken kata pengapul ras kata pergegeh?

Bangsa Israel iapuli nabi Sepanya erkiteken bangsa e enggo ndekah ndatken api pernembekh ate Tuhan. Payo, labo rasa lalap Tuhan e nembekh. Lit paksana susur ukurNa, ras ipekena-kenaNa bangsaNa. Labo meriah ukurNa adi bangsaNa nggeluh i bas ukumen si mberat. Ukumen e iberekenNa gelah bangsa Israel ngidah maka Tuhan e erkuasa ngaturken kegeluhenna. Alu bage reh min bangsa e man Tuhan dingin ngikutkensa segedang geluhna.

Seh paksana Tuhan ndungi ukumen bangsaNa. Ipelawes Tuhan kerina musuh-musuhna, alu kuasaNa iberekenNa kemenangen man Israel. Tuhan ngerajai bangsaNa janah iberekenNa keamananen dingin kegeluhen si mbaru. Kerina kalak ngidahsa maka senang me geluh bangsa Israel. Seh paksana iukum Tuhan me kerina kalak si nidih bangsaNa, ipulahiNa kalak si cempang-cempang, kalak si terbuang itaruhkenNa mulih ku kutaNa, simahansa akapna mela isalihken Tuhan jadi kehamaten. Ibahan Tuhan bangsa Israel terberita i belang-belang doni. Perbahanen Tuhan e jadi pergegeh ras pengapul man bangsa Israel, si erbahansa ia ermeriah ukur. Bangsa e rende ersurak ban riahna ukurna ngidah ras nggejapken perbahanen Tuhan si mbelin e.

Tupung kesusahen ras pebeben nderpa kita, tuhu perlu kal kita pengapul ras pergegeh. Teman manusia erbatas kebeluhenna ras gegehna ngapuli kita. Tapi, Tuhan erkuasa kap ngapuli ras nampati kita. Sura-sura Tuhan situhuna mabai kita ku bas kegeluhen si senang, dame ras mejuah-juah. Enggo seh paksana kita rende dingeh ersurak naksiken kiniulin Tuhan e.

☞ Rende ras ersurak erkiteken geluhna mejuah-juah